

縣志卷六

知縣咸學標重修

人物類

忠節

宋

陳咸字逢儒合漳人先世從宋南渡咸登淳熙

進士調南江尉吏受賄賦民不均咸白使者下

令聽民自陳委咸均之擢知南充縣遷資州以

最聞改知普州開禧用兵宣撫程松奇其才辟



主管機宜文字多所敷陳松不能用副使吳贍
蔑視松謀叛以咸名士欲首勸之檄咸議事不
往遂之利州方抵城僞都運徐景望已挾兵入
居臺治咸欲結王釜福艾二人誅景望既而釜
棄官去謀遂阻乃削髮披緇而去景望遣兵拘
咸於江岸曦欲殺之賴安丙力救得免曦誅咸
上表自劾丙與楊輔皆勸其出宣諭使吳玠亦
表其節詔進咸二秩尋以咸總蜀賦喪亂之餘
蜀賴以寧召爲司農少卿卒諡勤節詳見宋史

陳寅戚之子以父廢補官仍領漕司貢紹定初
知西和州西和邊鄙重地寅義不辭難北兵入
邊郡統何進與寅不合先去之獨統制官王銳
及忠義千人城守而已民始恃進爲固及進出
守大安舉室行人無固志寅獨留妻子誓曰人
各顧其家誰將共守乃散資財結忠義與推官
賈子坤爲必守之計元兵十萬攻城脅降者爲
先驛寅草檄諭之自執旗鼓激厲將士迎敵矢
石如雨元兵乍退詰旦復來寅率敢死士力戰

書夜數十合敵兵退制司以寅功徧告列郡諸將皆忌之敵伐木爲攻具增兵至數十萬圍城寅求援甚急久之制司纔遣劉銳收忠義人陳

瑀等往率皆觀望不進銳甫進七方關瑀未及

仇池皆以道梗告寅晝夜苦戰援兵不至力絕

城遂陷妻杜氏飲藥死二子岐嶷及婦俱死母

傍寅歛而焚之乃朝服登戰樓望關號泣曰臣

始謀守此爲蜀藩籬城之不存臣死分也臣不

負國再拜伏劍而死賓容同死者二十八人一

子後至欲自裁軍士抱持之曰不可使忠臣無
後與俱縋城亦折足死子坤亦俱死事聞贈朝
議大夫右文殿修撰賜錢三千緡卽州治與所
居鄉立廟加贈文華閣待制謚襄節縣北關有
忠節祠今廢

明

李國治歲貢井店人值賊攻寨急拒之度不能寬
懼汚及手刃其幼婦遂自到

李日新溫村人明末拒賊死難

賢達

戰國

馮

亭邑人秦攻韓上黨急時亭爲上黨守使人

告趙曰民不欲以上黨與秦願拜納於王趙王
悅乃使趙勝往受地以三萬之都封亭亭垂泣
曰是吾處三不義也爲主守地不能死而以與
人一不義也主納之秦不順主命不義二也賣
主地而食之不義三也今邑有亭故里併墓

漢

令狐茂相傳曰吾兒峪人武帝捕反者太子兵敗
上書畧云皇太子承萬世之業親則宗子也江
充迫蹙太子造飾奸詐太子進不得見上退困
於亂臣冤結無告不忍忿忿之心起而殺充臣
竊以爲無私心書奏天子感悟

宋

崔國華字德夫乘雲里延福村人善屬文克盡孝
弟宋時行三舍法崔由縣生入府學外舍未遂
志改入武學外舍留心武經練習弓馬果獲高

薦升入太學十年攻苦不減燈不解衣春試唱
名第四授承節郎宣和三年爲婺州金華縣尉
討方賊平餘黨進封武翼大夫

明

李徵洪武中進士知南鄭縣深達治體興利除
弊風移俗易遷陝西道監察御史

姚福永樂中舉人興濟縣教諭少貧乏油隨月
讀書帶經而鋤常講學以明體適用爲要時稱
爲理學先生

陳 璘字玉明正統間貢知井陘縣一廉如水有
狼害民子公牒告城隍果得其狼抵罪給養其
民又境有飛蝗公禱於天蝗越境去後朝覲入
京吏曹署曰天下清官第一勅命褒之今祀鄉
賢

周 晟字德明邑人後籍安陽年十九舉於鄉景
泰中進士父禹素長厚仕至鴻臚卿晟警敏溫
雅迎事而決初試政刑部司寇持法嚴少當意
者晟年纏弱冠鞠情上讞分析輕重一如司寇

意所出補主事尋遷永平府知府政尙寬大課
民樹麥貧民婚嫁有過時者晟設法爲區畫咸
使遂願郡中滯獄幾千人數日而決遷湖廣右
叅政再遷山東按察使江西布政使南北異風
晟酌勢權情因俗爲治所在有聲兄弟五人相
友愛其治經者皆經晟指授少弟景尙主樞貴
盛見晟俛容曲禮不怠晟以嫌不得仕至卿是
母喪旣禫而卒年五十一墓在安陽縣西

周景字德章晟之弟美姿貌廉靜詳雅好學

書天順五年選尙重慶公主主憲皇同母女兒
甚寵愛賜予無算日從遊幸而景詩書之外無
所好主事舅姑甚孝衣履多手製歲時拜謁如
家人禮近世之賢未有也景掌宗人府事以宏
治八年卒又四年主薨子四人皆以父廢官

王 科字進卿號龍山正德間進士知陝西藍田

縣藍城狹隘公拓而修之二倍於舊城中舊無
水引山西之水流通城內以資民用更新縣治
及公署學宮二呂先生祠木植磚瓦之用或取

諸所毀僧寺藍俗婚禮論財女有三十歲未得
嫁者悉令省禮成婚偶感夢旣覺令城門守者
遇遊僧俱令之縣數日內有遊僧十餘人公偵
其中有婦人僞爲僧服者遂寘僧重典而還婦
人原籍一邑驚神明母病思食魚時河凍令人
求之井得鮮魚以進母病遂愈人以爲孝感所
致近境土賊馬隆等數百人謀攻藍田公設方
畧防守先掘險隘且請兵勦捕賊知有備不敢
入境以能擢工科給事中秦府奏請修宮室下

部議公駁之曰陝西連年饑荒待豐稔後再議
事遂寢太監崔文傳平因修清寧宮正陽門等
工奏陞匠人等一百五十人官公曰此輩可陞
與否崔文傳平何不會同工部議請耶旋上惜
人才六事利民生八事論尙書金獻民西征無
功欺罔三罪又劾固原總兵趙文縱寇殺王英
庄寧夏總兵种勛玩寇失機罪奉命點京營則
劾武定侯竇放軍役并交結反賊李福達爲十
逆會權要右勛遂落公職公立朝風節凜凜士

論壯之居鄉蔬食布衣耕田治圃每勸鄉人
善勿佞佛酗酒涉俗漸化以疾卒隆慶三年
贈錄言官忠諫者贈中順大夫太常寺少卿
鄉賢

李 紹嘉靖間任井陘縣知縣有善政見井陘名宦

李 棟字尚隆號吉軒紹之子也西戌東村人登隆慶辛未進士令陽城剔蠹興利邑遂大治萬歷甲戌考績舉卓異蒙上面加獎賞賜金鈔符

等物仍賜宴禮部拜山東道監察御史巡

城廉得巨猾欲寘重典重賄倖璫求免棟弗見

託呂相轉懇之終不爲訛法巡醴甯浙舊多隱

蠹悉釐革仍罷一切辛權蠲逋課二十餘萬江

陵父喪當奔塋臣議留疏具不署名辛巳丁王

太孺人艱甲申起復改授浙江道時以寺人爲

內軍操演禁中言者輒斥棟抗疏極諫之已而

按淮揚等郡舉賢刺貪文武吏莫不悚息乙酉

江淮大水民漂溺者數萬家棟焚香籲天引咎

自責言畢水落復親乘舟往賑盡搜倉庫所貯
爲百姓代完田租一時全活者甚衆又辨讞寃
獄百五十人丙戌擢大理寺丞旋晉左戊子擢
右少卿尋晉左少卿壽五十七葬於鳳岡山入

鄉賢

董 槃嘉靖間資知榆社縣剛直廉介搏擊豪強
善類獲安遇黠寇犯內地公急令鄉民入城清
野待之躬冒矢石晝夜督守遣壯士夜斫齒營
獲首領斬之遂退去民賴以安皆槃保衛之力

也

李秉謙嘉靖甲子科舉人河南儀封教諭陞延安府推官再陞山西代州知州謫山東莒州判官復陞湖廣鄖西縣知縣致仕公情性簡直學問闕博居家十餘年當事薦剋六次惟以講學爲務著作極富曾修縣志惜不傳本府楊公爲之立祠清修雅範至今膾炙人口

楊其廉字計六明末進士令長垣述饑民疏忤當事謫揚州照磨歷陞兩淮鹽運副使告致後屢

徵不出疏草見藝文

國朝

李新鼎順治六年副榜授臨江別駕幼以孝聞執親喪哀毀幾至髡髮攝屬邑篆有李清天之稱因他事左遷再補趙州倅以積瘁終於官生平孝惠清介足以風世

李天福由明經爲建平令海寇犯宣城高淳且至建平天福以城小又無兵遣掾史繼清乞援於廣德州具言急狀不卽救民且塗炭比繼清還

而縣已被劫賊颺去州縣不能救又怒繼清言
切因文致令罪併及繼清是時郡州之染寇氛
者吏民相牽引連坐千餘家天福獨以身當之
而繼清亦慷慨引義備受楚毒無撓辭天福竟
坐死妻子徙邊一邑得全

任中柱字迴瀾號東臯學問該洽工制藝兼善古
文辭尤長有韻之文吐屬雋雅遺辭應律每一
篇出人爭誦之成康熙乙未進士改庶吉士假
歸養親絕不干外事母喪哀毀瘠立人稱其孝

服闋入都補館職未幾卒著有鏡晦堂集若干
卷禮部侍郎方苞誌其墓

康 杰字超凡號雙峯家世科第學有本源乾隆
丁卯舉於鄉歷任江蘇桃源鹽城青浦等縣陞
邳州知州精於吏事以強幹稱值淮水衝漲合
黃流爲患單舸風雨中查勘灾戶極意賑卹築
牐捍潮申啟閉之令民享其利歷除巨梟季光
祖大盜王匡等莠去而良以安課常爲江南州
縣最以勞卒於官

李 馨字芬宇號椒軒爲人篤默有守由貢生任

陝西商州山陽縣知縣縣土瘠田苦旱爲開渠
引水灌之歲收倍獲伉直忤上司意左遷涼州
府經歷攝分府值猗賊亂所在震驚有城守功
甘省捐賑事發波累甚衆以早歸林下又素謹
飭獨免優游鄉里生子三長長森次長楚次長
揚年七十餘別置瓦房扁曰退步處人罕見之
邑侯戚贈以集杜句云異俗吁可怪逢人問幾
賢羽毛知獨立鐘律儼高懸歲滿歸鳧舄朋來

坐馬羈難爲一相就佳氣拂周旋

孝行

宋

陳岐陳疑隨父寅守西和州元兵陷城母仰藥二
子及婦俱死母側世謂寅死忠杜死節岐疑死
孝二婦死義忠義節孝萃於一門寅三子俱死
其一子惜史佚其名云雍正六年岐疑人祀忠

義祠

男

周 道邑庠生母早卒事繼母以孝聞鄰里有不能婚葬者盡力捐助守道旌其門

李 仁紹父性至孝繼母生子恭仁悉以家產讓之奉養益篤每侍母病衣不解帶入府孝子祠王 觀事繼母以孝聞守道旌表

任 廉同妻康氏事祖父母曲盡歡心祖父母病劇至爲嘗糞守道旌表

李 灼監生授主簿父棟卒於京千里扶櫬歸葬廬墓三年院道旌表

楊如桂貢生其言進士其廉之父也七歲喪母哀毀傍徨不離柩側父病侍寢衣不解帶比卒廬墓三年朝夕焚香涕泣不御葷酒妻亦至孝院道上其事得旨建雙孝坊旌其夫婦雍正六年祀忠義祠

李良宦副貢母患瘡以舌舐之而愈嘗卻金暗室人愈重之

李鵬貢生兩事繼母俱以孝聞分產半給義兒不少吝歎歲以餘粟贖鄰人

李如柏李如同俱廩生兗州府通判熬之子孝行
純篤母病爭額天願以身代兄友弟恭一邑推
重

李環溫村人入邑庠天性孝友家累千金悉以
讓其兄若弟兄瑾早逝環撫其孤篤於已子咸
得成立邑令聞其賢屢賓禮之其後子孫貴盛
人皆以爲善之報云

國朝

楊生寅庠生母卒哀毀過禮不離苫次廬墓三年

朝夕哭泣不御葷酒知縣左印奇因合邑公舉
詳請旌表

賈俊舉人善事繼母遇病輒涕泣日夕不解帶
藥必親嘗邑人俱稱爲孝

李九思事繼母孝母病侍湯藥衣不解帶者四十
餘日每夜焚香默祝願以身代族黨稱頌邑令
旌之

李汝賢歲貢性孝老而彌篤母病侍湯藥衣不解
帶執親喪哀毀骨立邑令旌之

苗 祿字錫功事繼母孝母染病衣不解帶四十
日雍正元年歲荒米貴祿施粥兩月餘鄰里賴
生活者甚衆太守勘災至涉廉其義旌之兩飲
鄉賓以子芳蘭贈教諭

康 璋父早逝母失明朝夕奉養曲盡子道有二

弟請嚴師教訓仲弟琮舉鄉榜季弟聊食廩膠
岸終身友愛無間琮以能文名著有四書輯要
聊亦孝友母病衣不解帶者三月事兄如事父
璋子秉禮孫杰俱登賢書人謂積善之報

韓際柳秉性淳厚胞弟際蘇自幼失恃際柳撫之極其友愛教之入庠際蘇無子乃爲之娶妾復不育以子嗣之未幾際蘇與嗣子相繼而亡復以次孫繼之友于之行化於一鄉

趙庭桓增生事繼母孝母失明視膳定省四十餘年撫幼弟友于篤愛讓美分甘里黨中有婚喪不能辦者必盡力周濟邑令旌之

王仲蘭南岡村人幼孤家貧日爲人傭工以供母

鄉人感其孝多饋食而樂僱其工有勸娶室者

曰身養一母尚不給安能爲娶室計乎母每病
惟呼天而泣卽愈如是者屢母年七十五卒告
貸所識之家營葬而傭以償之終身未娶

李道生庠生明少卿棟曾孫事寡母如嚴父篤兄
弟如師友母呵責則跪懇必回顏而後起田園
肥美者必讓兩弟其季弟歿恤孀婦卹以完節
楊修德入右庠性最孝生事死葬俱能盡禮邑令
旌其門

薛公直家貧隨父出傭作父於路染疴思肉不能

得公直以刀割左股煎而進力扶父還家比父
卒竭力營葬廬墓所有蜜蜂數十羣飛集墓側
久之方去後竟以哀慕成疾而歿

李名世家貧力行孝弟繼母楊氏病故遺幼弟方
在抱令妻乳之父病三年事之惟謹不離床榻
鄉里咸稱其孝友

劉立業幼失恃事母孝母少有愠色卽跪請罪年
逾五十荆楚不免邑侯吳公以聲著老萊旌其
門養子仁無子爲娶妾仁感泣孝養倍至家務

甚得其力自生子曰允升捐職州同

李 誠家貧孝養孀母備得其歡心人以爲難

劉駱駝會裡村人駱駝其乳名也家赤貧少孤孝
事瞽母常爲人傭以資衣食早起出門必爲母
備一日之餐夜雖風雨必歸存問母壽近七旬
駱駝已逾四十猶未婚娶或勸成家駱駝曰吾
貧無以兼贍且恐娶婦未必能如吾之奉母也

王 遜本濬縣人姓李爲王三全養子事三全夫
婦如所生三全病劇呼遜曰予產薄又多逋欠

沙界元
予死後可歸汝宗
遂涕不已既葬父奉母王氏
十餘年孝愈篤存沒盡禮凡三全所欠稍稍清
還有餘以歸義妹生平篤信陰騭文事事敬奉
行之晚援例爲國子生

武連登孝事繼母如所生母得翻胃症醫謂難治
同妻李氏焚香虔禱願以身代母病尋愈

李鵬武庠國正子父有癩症不時而發鵬孝事
惟謹家貧夫婦常爲人傭暮必歸視父床榻三
十餘年未嘗少間親族共稱其孝

李之奇知縣蒲璧孫太學生成玉子天性孝友出
嗣胞叔玉璋後奉繼母如生母仍撫愛胞弟四
人衣服飲食如同居無所分異延師課讀皆成
器業親友間以忠厚取信調貧濟乏樂行善事
蓋今日古人也

任 良父歿時良甫十三歲二弟一幼一雙瞽良
孝孀母撫弱弟後二弟少亡遺二侄俱幼良復
教之成立入邑庠

李龍章府增生長泰知縣瓚之孫善事繼母母病

四載親侍湯藥無少懈爲祖父母建祠完父未
遂志祠左復建小亭三楹額曰念一其異母弟
龍溪亦感而輸祭田十餘畝生平言無隱諱族
黨無力婚葬者必慷慨周之其公正好義又如
此

范奇珍事繼母劉氏以孝聞

郝元孔孝事孀母善承其志母病侍床褥衣不解
帶爲之嘗糞邑令張以孝堪風世獎之

義行

明

趙 用偏店人正統六年饑出米一千二百石賑
之有司上其事勅賜義民雍正六年奉文入忠
義祠

李 榮溫村人正統六年饑出米麥一千餘石賑
之建坊旌義雍正六年奉文入忠義祠

王 金縣北關人萬歷八年饑出穀一千石賑之
賜坊旌義雍正六年奉文入忠義祠

楊宗仁下庄村人助義修明倫堂割腴田代完逋
賦生平力田一錢不餘兩舉鄉耆不赴邑令旌
之

李一正秉性純厚以孝義聞壽入旬有人舉鄉耆
邑宰李天柱旌之

尙 坤南關人好善樂施其友王堂常寄金於其
家時漳水漲發廬舍多漂沒坤負其金避高樹
上水定歸原金於堂堂分一半以謝卒不受有
富商羅馬斃其幼孫絕無怨言惟歸天命而已

各院道咸表其門

竇文會克敦敬讓三世百口同居內外無間言有
司旌其義

楊敬先南岡村人掌刑掾有鄉人以年老相鬪致
死其子夜持三十金賄囑冀招抵償不受誣者
得脫有充戍應遣者族人苦於津解兼利其資
夜共謀殺之哀聲震動敬先不避鋒刃趨救之
乃解其他善行類如此

張珣赤岸人正德時廩生誥封徵仕郎傑之孫

自幼期許輒以古人爲法雖閒居必正襟危坐
讀書刻苦至忘寢食且取予不苟一日自城市
回家得遺金於途因坐以待之少頃其人大哭
而來悉還之

吳守義灘裡村人施棺濟貧舉鄉飲

呂應爵孝敬持身謙讓睦里施棺濟貧捐資修路
年九十舉鄉飲

李 柵紹之長子莊重老練言動不苟孝友敦睦

張機解訟鄉鄰德之年八十累舉鄉飲不赴邑

令每傾慕其賢

李雲達性倜儻好義慕爲任俠明末寇患挺身率鄉衆捍禦寇不敢犯郡守王表爲七城逸俊

國朝

江正儒邑諸生明軒岐術常施藥濟人不取其直康熙六十年饑日施粥家廩爲空年七十舉介賓當事賢之贈扁曰心存利濟

李 瑤字佩玖邑太學生少失父身撫弟玠甫至成人弟早卒婦劉青年守志瑤待之有加禮并

以次子爲弟後從兄瓚卒於長泰任所遺孤幼不能返柩同族以道遠皆憚行瑤毅然請於母前往在道備歷艱險失足落水中致脛骨爲損卒扶長泰公觀以歸後逢陰雨脛骨常酸痛終不向長泰孤言所以嘗謂人生見義而爲皆分所應得豈以是市德故其生平善事人不能悉知云三子其季步青登賢書尤有名

郝元文廉介端莊少年失偶遺一子終身不娶

咸稱義夫兄弟分產倍讓子玉珮以孝聞孫培初生

張維祺字高生好學不倦淹貫五經惡異端於邪
正之分辨之甚力浮屠不敢入其門年七十自
號崇正老人所著有四書啟蒙五經叶韻等書
趙建堡吏員璋之子少喪父力持門戶撫弟成立
居鄉以方直稱或有爭競手執質親戚婚葬無
不周給卒年七十八子弟五世同居號爲義門
李富年家貧一日拾金於路守待其人還之邑令
聞而旌獎之

郝元祥字瑞呈性至孝見義必爲連年董治渠道

共推司直乾隆二十四年饑有貧不能給欲貸
子女者竭力周恤賴保全者數家居常勸人爲
善疾惡頗嚴父子兄弟間不相和者不敢見其
面有養子缺嗣爲妻妾凡諸建置關體要者皆
所經紀

程慶雲監生忠直性成言諾不苟乾隆二十四年
邑大饑出粟賑貸立粥場收貧人鄉里賴以
存活者甚衆

黃玉監生白芨村人村境接林縣中隔漳河民

病於涉貴玉於冬月建板橋夏則造船以渡工
役之費皆出己囊其子麟惠麟慈等繼之歲而
修理往來行人無不讓之

李文振監生好善樂施遇人艱苦必力爲拯救歲
終常施粥以濟貧乏鄉里義舉以身先出貴一
無吝色

康秉公性孝友弟早逝撫姪成立延師訓迪入邑
庠常設藥肆以濟人有行商止憩其中遺百全
待其人還之孫二俱庠生

馬萬有字瑞豐行二兄早卒撫義姪如己子家門
雍睦婚喪周急修大棧路里黨德之生子二長
得洹入縣庠

馮玉臺邑廩生存心忠厚處事和平周貧濟急好
善樂施與鄉黨宗族處從無疾言厲色人稱古
道

李遵字樂天仗義疎財鄰里族黨遇有艱苦竭

力資助事後并不以德色相加故人心推戴經

久不忘

馬文質值荒歲市集乏米質出粟給貧全活甚多
有不能還者置弗問一鄉感激邑令徐表其門
曰周急爲懷

郝 岐監生兄早歿體恤寡嫂撫姪成立分產隨
姪所欲絕不與爭鄉里稱之

郭明倫邑庠生性好義族里有急難往不計利害
勢有不能與者雖寢不安遇公事尤忘其在己
其生平概如此

范爲政吏員天性尙義有沿頭村王素先者曾寄

錢十人于南關王聚業舖後改寄政舖素歸
陸樹死素妻子仍向業取互喧爭將涉訟政聞
之乃認不諱兩家德之歸謝弗受隣里稱羨

耆德

明

吳宗儒邑庠生賦性謙和父兄悅其孝友與交者
卽稱有益鄉人有相忤者宗儒一勸卽解其爲
人所重如此嘉靖開學道獎之

楊弼景泰間貢天資厚重恬淡無欲終身不仕

王仁民廩生品行高潔識養淵閎造就後學多登仕版學道優獎之

馮時雨庠生事親孝撫幼弟友士林雅重之聆其談笑如坐春風連舉行優三次學道匾曰至德可師

李中杰邑增廣生學問有本末持己莊嚴甘淡泊不樂仕進遠近慕之流寇入境聞其名相戒勿犯李先生宅以孫夢麟貴贈文林郎

李維清萬歷四十八年舉耆賓

國朝

李若杜庠生孝友交稱以詩書啟後不問戶外事
字曰德修名稱其實鄉黨重之舉鄉賓

李梅台村人渾厚容隱嫺雅宗黨惠濟遠人嘗

夜見穿窬伏已屋上乃慰遣之次日密與之粟
又見有竊已柿者反避之迂道歸家恐竊者見
而驚墜也其寬忍類如此年八十餘舉鄉耆

李振先庠生大理寺少卿棟之元孫孝謹持身年
七十公舉鄉飲賓邑令黃以望重鄉評旌其門

郭 謹爲人詳慎縝密累舉鄉長里中爭質得一
言而決倡立橋社平道途以便行人卒年六十
九歲學諭陳坤載誌其墓子三入邑庠者二長
孫維屏由廩貢生試用訓導次孫維憲亦有名
賢序

申守宗秉性醇良傳家忠厚一鄉推爲黎獻子歲
貢孫庠生學憲王旌之曰齒隆玉杖

任君惠字愛民家世忠厚君惠尤沉靜寡慾足跡
不履公庭疎財仗義凡遇困苦無不周給公舉

鄉耆推爲一方正士

郝大學字明吾舉鄉飲賓子朋字信亭信行如其
父晚年家稍裕多濟貧急鄰里稱美亦舉鄉飲
賓仲子佩璋敦倫重學入邑庠

范 綝忠厚傳家義方訓子

李 馥素行謙和年八十舉鄉飲

王相和性耿直樂施予隣里不能婚葬者無不周
濟乾隆五十七年歲饑出貲粟以賑貧乏年九

十親見五世同堂舉鄉耆孫

純德入太學
錫麟入邑庠

趙鵬飛庠生疎財仗義族里德之

趙玉崑監生性慷慨施田鑿池以利一鄉

趙學朱邑庠生性格剛方一鄉稱爲司直

任中偉吏員品行端方居心正直雖饗餐不繼無

苟且授受事鄉人敬服

郝振清 趙文藻 呂 梓

何之福 田加貞 趙于蕃

江正人 趙燦然 杜生雲

李鍾祿 宋開基 王得璉

傅鴻帥

剛得功

牛映斗

以上數人皆
以行誼見稱

鄉里雖事實未詳附存其
其名以見勸善之意焉

臺德

宋

杜氏西和州守陳寅妻元身陷城寅曰若速自爲
計杜曰安有生同食王祿死不共王事者耶遂
飲藥死二子岐嶷及兩婦俱死母側雍正六年
奉文俱入節孝祠

明

賈氏王謙妻年二十失所矢志終節年八十卒
李氏王文妻十七喪夫終身守節無玷上司旌之

王氏生員張堂妻年二十喪夫善事舅姑義方訓
子至老無議

李氏張思溫妻堂男婦早年喪夫誓節養姑分守
道旌之

王氏成祿妻正統時人無考

王氏生員薛霖妻

馮氏王範妻

任氏申通妻見磁州志守道旌獎

李氏貢生張問政母自幼喪夫奉姑教子一準於

禮知縣旌獎

康氏申雄妻二十四歲夫故艱苦萬狀躬紡織撫孤入庠督學兩加旌獎

李氏王至明妻二十二歲夫故無子守節年八十而卒縣令游旌其門

任氏張興詩妻年二十喪夫孤子方數月姑令其改嫁誓撫孤守節不厭貧苦年七十有司旌其門

趙氏生員李元妻年二十喪夫撫三歲孤誓不再

嫁有司表其門

任氏魏宗漣妻年二十四歲夫故撫一歲孤成人
有司表其門

王氏李體仁妻年二十夫歿遺腹生若輅躬紡織
以延師課子成立府道兩旌其門

李氏生員楊一鳳妻年二十四歲夫逝苦節自守
撫幼子耀紳成名後中副榜

李氏儒士趙崇善妻年二十四歲夫歿苦節
教子英年入類有司表其門

程氏王道立妻夫早卒誓不改節孝事繼姑人共
賢之

趙氏郝自行妻夫早故生子登科甫三月撫孤終
節操凜冰霜

張氏廩生李躍鱗妻年二十三夫卒姑老子幼貧
窘無倚張奉養無缺課子成名縣令史表其門
曰節孝可風及沒親爲文以祭之

張氏程自學妻夫早故青年守節貧而無子至老
彌篤縣令表其門曰柏舟苦節

席氏任岳妻夫故家貧或勸再醮席泣辭之因毀容以示終節

趙氏王朝周妻少寡矢節撫孤

王氏生員李輝妻夫歿時年方二十一歲堅志苦節三十年直如一日

武氏程光耀妻夫早故氏甫二十二歲家貧苦節撫孤入頻邑令表其門

楊氏監生李均妻夫早卒年二十歲苦志事姑撫子入泮邑令旌之曰柏楫熊丸

蕭氏馮甘露妻夫歿姑強之改嫁因自縊救免遂
得終節撫子入庠

楊氏馮必啟妻夫故氏年二十二歲一子尙在襁
褓誓守節撫之

武氏生員趙蓋臣妻年二十五守節撫孤入泮

張氏生員李日新妻夫死難後氏年二十四歲廿
貧守節

馮氏王任臣妻夫故年十九立志撫孤孤旣夭仍
苦節終守歷年八十邑令旌表

趙氏李登妻年二十二寇難抱幼子投火死燬燼
中猶見母子相抱狀

王氏鄭永祿妻賊至投崖死賊高其節具土掩之
副使表其門曰貞烈

張氏楊文采妻年二十五賊至不受辱投崖死賊
具土掩之楊副使表曰貞烈爲雙烈文祭之

賈氏魏家灣人姑病思食肉家貧且離市遠氏因
割股一片進姑食而甘之病遂愈

王氏楊如桂妻翁疾藥必親嘗告天願以身代及

翁歿如桂廬墓側氏竭力奉姑朝夕無間
其言由貢舉任教諭陞大田知縣季子其廉
第授長垣知縣後起陞鹽運副使人謂孝感
道張扁曰篤孝天親詔建坊表其夫婦雍正六
年奉文入節孝祠

李氏三世傑妻姑患瘋疾十年奉養不倦

宋氏陳閩妻祖姑老而失明氏奉養數年不離床

楊

王氏楊其言妻性賢淑妾亡撫其二子如己出邑

共賢之

王氏生員任嵐妻善事舅姑守道旌獎

李氏王尙賢妻性至孝守道旌獎

國朝

王氏李雲達妻青年喪夫堅志苦節義方訓子相

岐相徵俱以國學成名孫入人名噪膠庠邑令

旌其門

邵氏生員李鏘妻少鄉徠之曾孫婦也夫卒氏年

十八歲撫兩月兒孤矢節不變竭力事姑和九

教子卒至成名邑令屢旌其門

任氏李純伯妻年二十三喪夫姑老子幼家無田
產代人紡績度日茹苦萬狀及姑卒葬訖親族
勸其改節氏誓死不從撫三子成人苦節四十
年邑令旌之

任氏楊芬芳妻夫故年二十無子守節年逾六十
邑令旌其門

程氏張玉生妻幼有志操一日夫往親戚家暮未
歸鄉人賈黑子窺隙夜入其室氏不從賈以刃

劫之氏驚喊買以刀戮其腹腸出於臍而死臨
死謂人曰吾不幸遇惡少年之辱命也吾義不
可污得爲張氏鬼足矣何以生爲死時年二十
二雍正六年奉文入節孝祠

王氏程世徽妻二十一歲守節歷三十五年撫遺
腹子之亮入庠乾隆三年建坊旌獎

楊氏生員江景妻乾隆六年旌

申氏康奪粹妻二十三歲守節撫遺腹子良嗣入

庠乾隆十二年旌

王氏牛起德妻乾隆十三年旌

劉氏生員李玠妻二十三歲守節撫嗣子黎明入
太學卒年六十三

申氏李宗義妻十九歲守節教遺腹子入庠孝舅
姑

李氏申容卿妻二十喪夫無子孝舅姑誓死守節
張氏李廷儀妻二十喪夫無子事翁守節三十餘
年

申氏李廣大妻撫週歲孤入庠孝翁守節六十年

江氏監生賈珂妻二十歲守節一子一女俱亡事
孀姑以孝聞

范氏貢生李罕繼妻十八歲而寡撫前子守節終
年八十九

李氏郭紹先妻守節孝姑

申氏李宗賢妻十九歲守節家貧教子成立

江氏李相巖妻十九歲守節撫孤以孝聞

李氏李士瑾妻二十六歲守節通書理嗣子及孫
皆自課讀人庠者二領鄉薦者一年七十四終

李氏張武妻守節孝舅姑

李氏生員楊化春妻孝姑育子守節三十餘年

李氏生員李厚生妻十七歲守節教子入庠

李氏生員李梅生妻二十歲夫亡撫前妻子守節

四十六年

劉氏靳大林妻夫亡守節教二子成名

李氏生員李興隆妻二十八歲守節撫八歲孤可

珍茹荼畫荻朝夕述遺言訓示嗣入廩貢邑令

俞學諭苗歷旌表之

李氏程至德妻十九歲夫亡守節撫遺腹子入庠
學憲旌之

王氏與夫楊文煥本晉陽人徙居涉夫婦性俱至
孝常追痛其親之亡肖像事之旦夕必面文煥
或外出氏祇奉惟虔一粥飯皆躬薦焉文煥歿
二子尚幼無期功彊近之親氏力持門戶內外
一無廢弛爲二子擇師傅或躬自課督周貧乏
如其夫在時守志歷四十餘年勤苦不衰終年
八十有三長光元庚子舉人次毓然貢生

薛氏生員馮直妻夫歿氏年二十四撫孤抱
玉成立入邑庠兼以學行聞早歲歿於水氏悼
門戶之衰更撫兩孫成立年七十餘猶勤績不
已

孫氏郝同元妻子永德甫一月而同元外出謀
生不歸氏青年獨居仗十指以活比永德稍長
聰敏能貨殖自闕東尋其父還同元心感氏謂
氏吾不能贖若兼以彌月子爲若累今幸子長
成人能迎我夫婦再聚不至身老死口外吾德

若并心愧若也永德以經營晚益裕授例入太
學氏年七十八

馮氏程玃雲妻二十六歲夫亡悉屏鉛華誓守節
撫孤鄉里罕見其面修橋砌路累賑貧乏曰爲
吾子廣陰隲也子方升入邑庠性亦喜施蓋得
於母氏之教云

王氏苗文妻文歿氏年二十四歲家貧無子艱苦
自守積四十餘年冰霜不改

張氏李延賓妻年二十一而寡遺孤正仁未彌月

泣曰李氏血食在是未亡人安敢死乳哺恩初
備至卒撫其孤成立爲鄉善人孫先春補邑弟
子員氏年八十一歲親見之

張氏雍正庚戌進士李成蹊妻本世家女嫻婦誠
孝敬公姑夫貴氏未嘗有驕色旣寡益勵志操
常勉其子以力學繼先業故三子皆能以儒起
家云

馮氏生員苗芳桂妻二十五歲夫歿兩孤一甫數
齡一猶在腹氏傷心集蓼苦節茹荼上則敬奉

其親下則勤撫其子慈孝兩盡迨後兩子皆賢
諸孫同時入庠家日隆起身享高年武涉二邑
交獎鄉里莫不榮之

傅氏趙國幹妻年二十悼失所天誓相從泉下家
人防之緊累求死不得遂不食數日而終

馮氏楊重元妻夫亡氏年未二十藐孤在抱上有
衰病之舅氏躬奉湯藥以孝聞且能撫成其子
邑侯旌其門

趙氏趙季之妻二十七歲而寡苦節自誓孝事翁

二十餘年撫子蘭入學

郭氏趙存仁妻二十六歲守節事翁以孝聞學論
表其門

馮氏張文登妻年二十四夫故苦行全節以二歲
堂侄爲嗣愛若己出

李氏儒家女父登庸有聲鄉校氏幼秉其教有志
節適康繼康數歲夫歿而無子以侄寧嗣勤苦
持門戶善事翁姑教嗣子歲而有恩年七十郡

邑文獎

張氏王宗孔妻二十四歲寡居誓志完節撫孤入
庠卒年七十三

馬氏李洪基妻二十三歲夫亡持節四十年撫教
孤子入庠邑侯以節孝懿範旌之

劉氏申承堯妻年二十七而寡遺孤惟一甫五月
躬乳哺至成人教之讀書此長為明經平生志
節凜若冰霜羣請於學憲旌其門

馮氏晉泰增妻年二十五夫歿守節事繼姑至孝
撫弱叔成立學憲蒙有志烈秋霜之獎

張氏陳良言妻性至孝姑病思肉貧不可得乃自
剖股肉以進姑食而愈後十年乃歿

趙氏郝進旺妻二十三而寡遺孤僅三歲守節持
家孝事孀姑人稱賢婦

申氏康秀成母夫故年二十一遺子甫六月有孀
姑近七旬竭力奉養撫幼子成人三十年節
冰霜

康氏武庠張思敬母思敬甫二歲而父歿青年宜
鵠聞兒啼肝胆欲裂剪髮誓志卒能撫其孤成

名學憲夢表曰冰霜苦節

孫氏郝崙妻二十八歲夫故二子俱幼勉支門戶
冰節自勵長入太學次補邑庠卒年七十八歲
學憲劉旌之曰闔範清嚴

孫氏任儉妻年二十四守節事姑維謹撫教二子
成立長鳳翔入庠隣里公表其門

張氏樊質全妻年二十一夫歿於外氏艱苦守節
撫週歲子稍長親携之尋夫柩歸葬道途風雨
備歷况瘁至衣履盡敝其志亦可悲矣

張氏常中天妻少事翁姑以孝聞夫中年得癰症臥床褥十餘年子二長入庠早卒次尚幼家貧氏自忍饑寒奉養無缺勞苦憂慮竟致成疾夫歿未幾亦卒

郭氏廩生楊象賢妻二十六歲守節孝事孀姑撫教二子相繼成名學憲劉以盛世女宗旌之

李氏其夫曰掄揚壯年嬰疾氏視湯藥終夜不解帶卒不起有孤甫二歲躬撫養備歷勤苦守節凡六十一年壽八十六歲

楊氏王秀妻夫故氏年二十五貞心守節撫子成立年七十鄉閭公表之曰節兼松柏

龔氏李玉章繼室孀居時年二十一兼無藐諸姑堅守完節以義命自安痛悼其夫中年而逝

申氏常卿妻二十五歲失偶遺孤未週歲撫養成
人爲娶媳幸有孫而子歿媳改適人乃躬自撫
其孫艱辛備歷見者咸爲嘆息

周氏馬玉泳妻二十五歲而寡有孤長僅扶床撫
教至成人終身不御鉛華年七十六邑侯以操

並柏舟旌之

史氏任君奇妻夫歿氏甫二十四歲甘貧守節學
諭周美之曰此蓋心桂節老而不移者也

張氏生員牛廷獻妻二十三歲夫歿撫二歲孤矢
志守節事孀姑克盡孝道三十餘年始終無間
邑侯表其門

劉氏崔永清妻年二十夫亡憤不欲生有遺子在
抱親族寬解強爲進食飲泣吞聲竟成痼疾未

幾亦卒

楊氏少孤苦爲張維童養妻育於繼妯王氏所維
亦家貧氏常苦於針黹配後甫周歲而家遭疫
姑與繼相繼歿氏連營兩喪遺孤在抱焚燒無
倚終夜屢積苦寒欲脫見者爲心恻而氏於艱
苦萬狀中卒能撫其子世魁有成厥後家稍裕
享高壽咸謂苦節之報云

薛氏楊廷母廷父亡甫二歲遺孤在抱上有垂白
氏勞苦經營慈孝兩盡年七十餘習勤不已世

賈氏候補州同知李玉樹妻夫歿守節奉孀姑生
養死葬人無間言撫子人庠

申氏貢生守信長女適康汝誠年十九夫故有乳
哺子甫二月立志守節姑患癱症朝夕奉事久
而不忘蓋節婦亦孝婦也

傅氏申秀妻二十三歲守節撫孤孝事其翁常齋
食以供甘旨

李氏楊裕太妻夫故年二十五矢志靡他孝公姑
撫四歲子建厥入太學子故遺孫一亦夭復撫

從孫爲嗣年七十四終身茹苦有人所不堪者
李氏楊祖純妻長泰縣知縣李贊之三女庚子舉
人先元之家婦祖純死時氏年二十歲白紵
黃衣掩尸隱泣而外怡其舅姑不敢露慼戚之
容守節凡三十餘年其堅貞如一日也

段氏杜金貴妻年二十一夫歿苦節自勵孝事公
姑無子以侄伏子嗣

高氏曹貴卿妻年二十二守節事公姑盡禮撫胞
年富章爲嗣性格端嚴頗笑不苟

任氏苑旭妻旭死氏年三十一遺腹生一女泣曰
吾無望矣然命也豈以易吾節且必有子而守
得爲節乎識者義之

王氏李成芳妻年二十六歲夫故貧苦守節撫子
成立

康氏邳州知州杰之長女年十五適同里苗永清
甫二年而永清歿氏誓不改節先是永清祖母
馮以節孝重鄉里氏繼之一門祖孫兩節婦不
愧詩禮之家云

傅氏李升聞妻年二十三夫故遺子甫五月誓志
撫孤先後三十一年於婦道母道兩盡

趙氏董考祥妻二十四歲而寡無公姑可依苦節
撫孤三十餘年如一日

江氏李和倫妻夫歿撫教幼孤維良成立入太學
晝夜勤苦治家有法當事旌獎

王氏牛麟生妻夫故年十九哀毀骨立恪守婦則
孝公姑和娣姒年近六十戚族咸敬之

李氏劉信妻信無子力勸置妾小家女恃愛多過

教氏每優容之並時時諭誡其妾感之卒化爲
良婦生二子妾尋歿氏撫教成立鄉里賢之

趙氏李萬倉妻年二十五夫歿遺孤三俱幼而家
貧不能給日夕氏茹苦自甘誓不易志母家頗
豐間來存問然氏終不以艱苦告先後三十餘
年夷險一節卒能令其子俱成立焉

劉氏崔仲謀妻家貧奉孀姑至孝邑令張旌其門
并爲文獎之畧稱固縣村民崔某 妻劉氏據
伊姑王氏匍匐稟報兒媳平日克盡孝道歲荒

自忍饑寒兩次剪髮易米奉姑本縣大爲嘉悅
因親題賢孝匾額並給以錢米用勵風化焉

張氏楊楷模妻二十二歲而寡勤苦持家孝翁姑
撫子入太學

郝氏王朝相妻年十九夫歿痛不欲生幸遺腹生
子氏慨然以撫孤完節自誓三十餘年操勵冰
霜董誠嚴肅闔門奉爲家督

楊氏孫永芳妻夫歿時年二十六撫六歲子堅心
守節未幾子亦夭又撫嗣孫備歷艱苦

李氏儒家女適李周南爲妻甫入門卽能執婦道
事舅姑不失愛敬兼能勉其夫勤學早歲入庠
未幾歿氏年二十六無子誓不改節撫堂兄子
爲嗣愛若己出與親族處寧讓勿爭鄰里共稱
其賢

張氏李爭榮妻夫早歿氏苦節撫孤成立終年六
十五

李氏吳汝正妻夫早歿矢志冰霜撫孤成立有司
旌表

李氏李爾璧妻喜聞讀書聲因子萬年丁孤理家
務援例入太學爲孫鴻志延師訓迪早歲入庠
學憲旌其門

劉氏貢生李蘭妻孝事翁姑義方訓子長次入太
學三入縣庠皆恪守規矩無敢稍越邑令楊優
獎之

賈氏崔潭妻夫歿氏年二十八歲仰事翁姑俯蓄
子女里人共矜其節

常氏趙廷璧妻年四十餘無出勸夫娶妾康氏趙

歲餘生子甫逾月夫逝時康氏年方十九與黨氏截髮自誓撫孤趙煥成立

張氏樊椿妻夫歿氏年十九撫兩月孤苦志守節孝事老翁養生送死盡禮延師課子入庠族里賢之

李氏王夢球妻夫歿氏年二十二歲事翁姑惟謹翁歿事孀姑二十餘年奉養不怠撫孤成立訓孫入庠終年七十

趙氏廩生煥然孫女適郭鳴盛爲妻夫病劇囑曰

吾病若輩汝少而無依早適人可也氏泣曰君身若有不測吾有死而已不忍負君也未幾夫歿氏尋自縊卒年十九歲

江氏趙性兒妻性兒憨蠢不知人道氏于歸相伴三十餘年仍一處子夫歿家無斗筲紡績度日守節終身口無怨言卒年七十五

姚氏農民薛悅妻夫歿年十九歲撫一週歲孤家亦無所積族有偏其改適人利其嫁儀者氏以死自誓所撫孤幸成立氏以勤儉善持家忍苦

二十餘載生計畧可支胞弟亦早歿遺弟婦雖
分居能調其乏困故鄉里稱其賢計孀守二十
八年

苗氏范爲經妻經早歿無子氏撫姪爲嗣終身苦
節現年六十三

李氏楊習仲妻十八歲守寡家貧親老勤苦備歷
以兒子作梅嗣入府庠

王氏楊克明妻十九歲失配謹守閨範不辭勤苦
撫子成立

李氏庠生九功女增生趙蘊乾母持家有法義方
訓子

苗氏監生趙勵超妻舉人芳蘭姪女夫歿無子氏
矢死守節撫姪孫爲嗣教養成立

薛氏張藻章妻夫死孝事孀姑撫子成人苦節四
十年

王氏肖魁元妻

王氏馮宗舜妻

段氏王才妻

楊氏

楊氏師和妻

王氏宋長祚妻年二十五夫歿撫遺腹子成人霜
節不變

楊氏張萬倉妻夫歿氏年二十一歲撫兩月孤成
立茹苦守節卒年七十三

郭氏張瓚妻少寡撫孤成立學憲汪獎其門曰蕙
賢凌霜

熊氏王珠美妻二十六歲夫故矢志靡他撫教幼
孤成立未幾子亦歿又撫幼孫苦節四十餘年

史氏監生趙連璧繼妻

康氏庠生趙勵杰繼室年十七適杰逾年杰歿氏以髮投棺矢志靡他苦節冰霜迄今四十年

馬氏王得元妻先是其祖姑及姑俱以節孝稱氏適王未幾夫亦歿無子氏撫義子女孝事孀姑姑有疾氏禱願以身代冬不服綿絮人公表之曰三世節孝

霍氏劉立業母二十八歲守節操凜冰霜義方訓子卒年八十四歲

李氏監生江考壽妻登封教諭玉麟女布政司經
歷鵬舉母幼嫗女則長敦婦道事夫惟謹訓子
克嚴邑侯戚以風垂貞則獎之

郝氏劉明新妻年二十六夫亡氏晝親圃夜勤
紡織撫七歲孤之死靡他邑侯戚旌其門曰

巴臺高節

高氏王如山妻堅貞守節食苦自如邑侯以松
心梓骨獎之

楊氏武生李秉文母年三十而寡翁姑在堂子甫

離抱氏立志守節盡婦職訓子成立鄉里稱之
成氏高清寡夫歿氏年二十七歲撫三月孤茹苦
守節撫孤成立現年七十九

楊氏楊正人妻夫歿氏撫六歲孤矢志冰霜甘貧
守節現年六十六

崔氏李宏妻夫早歿茹苦守節現年八十七
李氏李學孔妻夫早逝貧無立錫地拾薪採蔬自
給有逼氏他適者則志終不移現年五十九

張氏監生馬孔祥妻奉
教子婦道克敦

涉縣志卷七

知縣戚學標重修

雜志類

古蹟

趙簡子城在縣東北井店村簡子索衛貢五百家欲歸之晉陽邯鄲大夫午不從遂殺午趙穆涉資以邯鄲反使籍秦圖邯鄲又與荀寅范吉射爲難寅奔邯鄲簡子卒拔之相傳此其駐兵處也舊有城址尙存

壺關口卽吾兒峪

明史作吾而谷未韓魏公詩作吳兒谷

與黎城接壤

水經注壺關故黎國也有黎亭縣有壺口關本壺口關別爲壺關口也涉故兼黎地兩縣皆得有之矣今潞安府別有壺關縣郡志以此爲西壺關唐昭宗時葛從周將千騎潛自壺關夜抵潞州犯關入城卽其地也

毛城在毛嶺漢袁紹拒曹操與審配議發檄使武安長尹楷屯毛城通上黨運糧處城卽其所築也今尙存城址

北齊離宮在唐王山麓文宣帝高洋性侈好土木往
來晉陽所過多起離宮又信釋氏喜刻經像山中
遺跡猶存或多誤爲神武帝高歡事今黎城武安
林縣俱傳有歡避暑宮考歡一身創業無崇侈之
事且爲魏相未篡位不得有宮傳載神武嘗諫魏
主言持齋誦佛造寺粧金乃異端惑民之術益詎
勒經鑿佛爲洋而非歡矣別詳唐王山條下

岳尚書城縣西北十里臺村相傳梁尚書岳貞故甲
城卽其父子築

符山石馬世傳唐李靖徵時過此夜投姬家宿聞叩
門聲甚急曰天符命行雨姬謂靖曰吾子適他出
煩郎君一行取黃頸韉青驄繫一小瓶戒曰俟馬
鳴卽出瓶中水滴馬鬣上勿過也靖如命行意一
滴何能濟旱遽下二三十滴次日視地水深三丈
所乘馬卧地汗流乃石馬姬已失所在今其地名
馬佈村由此也

漢縣故城在今縣西二里清涼村或曰卽今故縣鎮
是云縣西者誤也

御寨在青頭山周嶺爲外邊城絕頂一峯爲天休臺
臺下坦處爲觀營殿又下坦處爲符闕山下舊有
後唐同光三年紀功碑見金石文字考蓋莊宗伐
梁由壺關出邢洛進取相州時駐兵處荒烟蔓草
中遺蹟猶髣髴可見云

宋大觀碑在縣城西南爲宋學宮舊址碑記剝落不
可讀有大觀字樣金石考疑云所載大率皆取士
行三舍法碑今已斷爲三

白雲亭在清泉寺明任令澄清建爲遊眺之地寺傍

石刻甚多有石壁鑿百丈丹梯四望山河八字邑
令羅濤書又有推官張玉車大書尋山及入山小
憩字又有萬歷間別駕趙東魯書採奇字貳守王
鉞書入妙字其坐吟石大書係大夫陳乙俛書尤
奇古可愛不知何時人也

屏翰樓在響堂鋪明嘉靖二十一年巡撫魏有本飭
屬建初本爲邊防設後遂爲一邑遊覽巨觀過者

多留詠

戰國太守馮亭故里在縣西乘雲社道傍有樹碑按

黎城志漢將軍馮奉世等皆亭之後舊志有亭在
在縣西一里許古圖經又云在縣東三里韓王山
下傳說不同

漢三老令狐茂故里在響堂舖卽吾兒峪

宋武翼大夫崔國華故里在七原村

宋司農卿陳咸故里在合漳村按宏簡錄咸父升卿
官臺諫靖康從南渡遂留家臨安弟巨卿無子以
咸爲之後由南籍取應史不詳其本里失之也

明駙馬周景故里在原曲村景別籍安陽明史稱安

陽人實涉產也今村內尙有其父進士坊

明少卿王科故里在井店村

明少卿李棟故里在西戌村

明副史楊其廉故里在南岡

漢令狐茂墓唐十道志云涉縣有令狐塚在積布川

上黨記令狐茂隱城東山去郡六十里卒葬其處

輿地志潞安府壺關縣有令狐塚莫究其實也

梁尙書岳貞父子墓在臺村山下

宋武翼大夫崔國華墓在七原村有金大定十四年

所撰墓志佚其名

宋楊將軍墓在楊家寨

宋襄節公陳寅墓在合漳寅死蜀中又當時兩北距隔何得還葬故里或其子孫衣冠之葬耳

明少卿李棟墓在鳳岡村

明少卿王科墓在寨上村

明副史楊其庶墓在南岡村

溪王墓在縣西南隅一百五十步見古圖總不知

王墓也

劉詩書墓不知何時人墓在連泉村

麒麟塚在北關外明末縣民家嘗產麒麟鱗角殊異
旋死瘞此里人至今呼爲麒麟塚

星石在邑治大門內石質赤黑而紋紫上有刻文石
尖肖人面目相傳隕星所化

古槐樹邑有三皆植自唐宋一在故縣鎮大十數圍
枝幹扶疎狀類虬龍一在灘裏村連數抱漳水衣
發鄉人多依以避難一在上東村大六七圍枝葉

密蔭蒼鬱可愛

王鼎在胡峩太山行宮明澤王怡煒鎬

祥異

元

延祐元年秋八月地震壞民廬舍壓死甚衆

明

嘉靖八年己丑星隕大饑人相食

十三年甲午星隕甚多

四十一年賊入境殺掠甚慘

四十三年漳水發漂沒南關溺死無數

萬歷九年至十一年俱旱

十五年麥秀三穗

十九年妖氣自西北來變婦人形專傷男子面目

四十三年地大震

四十五年大蝗

天啟六年六月初四日夜地震雞犬皆驚

崇正元年正月十七日陳家庄陳所抱家產麒麟

六年流賊入寇殺傷甚慘

十三四年大饑人相食

順治二年五月大雨雹傷麥地震有聲

四年井店村江攀洪妻一乳產三男何登斗家牛
產犢五足一足在項七月蝻恒雨

十一年七晝夜漳水發近漳田土悉被漂沒民苦
芒糧累至今

康熙四年大旱民饑

七年五月地震七月漳水漂沒民田

二十三年漳水大發冲毀民田

三十年春不雨無麥至六月乃雨忽有飛蝗蔽天
漫野青苗嚙傷俱盡合境饑居民流散

六十一年大旱民饑米涌貴

雍正元年禾大熟

乾隆二十四年大旱民饑六月二十六日漳水大發
漂沒民田

二十五年春大饑麥熟民多瘟死六月二十六日
漳水并城東旱河大發環城巨浪侵蝕田園

二十六年六月二十六日漳水大發入南關

二十七年六月二十六日大雨壺秋禾盡傷冰積三尺餘數日未消

四十八年七月內學署產紫芝三莖

五十年四月初十日酉刻黑風自北來咫尺不辨有火光見於黑氣中狂風大作

五十六七年大旱米麥昂貴斗米錢一千

五十九年六月二十四日漳水泛溢入南關毀民居城幾不保知縣戚露跪禱復將涉縣二字匾額投入水中水立退沿河地多漂沒

水經注 卷七
六十年五月十九日雨雹大如拳瓦屋俱損牛畜死者甚多

嘉慶二年六月馬佈村雷轟三人其一人立死其二人被龍傷傷痕如火烙

三年六月震雷董礦村牛被震死七隻

雜述

水經注漳水又東北逕壺關縣故黎國也呂后元年立孝惠後宮子武爲侯國漢有壺關三老公乘與

上書訟衛太子卽邑人也据此則上書訟寃者又

爲公乘與非令狐茂也今黎涉諸志並據漢書爲
令狐茂事公乘興之名知者或罕焉

晉書太元十八年十月燕主慕容垂擊西燕慕容永
正月次于鄴部分諸將分道壺關滏口沙庭以進
永分道拒守垂乃屯鄴西南數月大軍由滏口入
天井關伏兵邀其太行之還援者大破之又晉太
和五年秦王猛圍鄴慕容垂自沙亭屯內黃此則
今大名府之元城古沙麓非涉也

北齊書文襄欲往晉陽時赫連子悅除林慮守

今林慮

言臨水

北魏時縣名

武安二縣去鄴遠山嶺重疊車步

艱難若東屬魏郡地平路近文襄笑謂卿徒知使民不覺損斲子悅答言此因民疾苦不敢以私負公據此北齊時臨水又嘗隸林慮矣

新唐書李師晦本宗室子始劉悟辟致幕府見從諫稍恣橫假言求長生術不與事從諫使歸東都師晦懼爲張谷陳揚庭等所譖請居涉從諫不之疑及從諫子稹敗有爲帝言者擢伊闕令

唐昭宗大順六年朱全忠令朱崇節據潞州李克用

遺康君立李存孝圖之全忠遺驍將葛從周由盛
闕夜抵潞州解共圖潞復歸克用當全忠之強克
用不敢出澤潞其後存勗嗣立脅下趙王鎰晉趙
爲一全忠轉畏之梁乾化元年聞沙陀兵欲出全
忠自如相州士卒多逃亡及貞明初張彥以瀛衛
等州降晉存勗遂拔相州

明嘉靖時江浙征倭所募礦夫有河南嵩縣李和尚
李利虛氏王九張文廣永寧馬雄張呂登封王試
宜陽葉張飛靈寶王九宰等而以涉縣夏時生長

其地習知礦場之事俾統領之時有戰功於浙見
籌海圖編邑志不載其官勲莫得而詳矣

涉呂明季數有土寇萬歷三十九年秋陝西客張汝
洪等挾貲至縣境猛虎村被劫鄉民逐盜出武安
西井村賊張甚數百人莫敢撓其鋒賴其地鄉民
王恩榮兄弟五人力救禦遂擒賊

明萬歷間磁州借武涉二縣驛馬暫用遂成陋例初
猶協濟銀兩繼遂輪派馬匹大爲民害武安知縣
設計除去兩邑之人皆德之

武安境內有白龜泉神祠禱雨輒應會武涉二邑並
旱武令李茂椿祈於神而大注而涉未也涉令蔡
思續聞之移闕於李請代禱亦隨禱而應闕役回
而四境已沾足矣李蔡二令各有靈泉祠祀記其
事

李中杰成湯廟記崇正戊辰流寇起關中癸酉入涉
境近我村落本村千餘家極力抗禦相持者一年
迨十一月十七日賊大眾環攻勢不能支始棄村
奔逃賊據更樂十一日始拔營南走我村向稱千

餘家者僅存七八百戶而廟之東西廊亦大半燬
祖龍矣

明史流寇傳初賊之破澤州也分其衆南踰太行掠
濟源清化官軍擊之賊遁走別賊復闖入山西大
掠順德真定間大名道盧象昇力戰却賊賊自恐
臺摩天嶺西下抵武安破總兵左良玉潞王告急
詔遣總兵倪寵王樸率京營兵六千與諸將並進
賊欲從河內走太行曹文詔邀擊之不敢進賊之
敗於山西者亦奔河北合營高迎祥李自成張獻

忠曹操老獬獬等俱至京兵蹙其後左良玉湯九
州等扼其前連戰於青店石岡石坡牛尾柳泉猛
虎村屢敗之蓋崇正六年事也

又曹文詔傳崇正六年四月紫金梁老獬獬自榆社
走武鄉過天星走高澤文詔皆擊敗他賊圍涉縣
聞文詔破賊黎城解去五月賊犯沁水文詔擒其
魁大虎又敗之遼城毛嶺已而賊敗鄧玘兵於林
縣文詔率五營兵夜襲破之涉境之得全文詔力
也

崇正五年臘月流賊邢紅狼破遼州其明年冬賊之
自西來者皆屯上遥時左良玉駐涉黎邑令陳夢
瑋令李孝廉甲黃爲書請救良玉自涉赴之賊望
見遁去

又十七年李自成陷京師其黨破武涉林縣都司高
應詔拒之戰死倪村

考辨

涉分野舊屬昂畢以本冀州域也黃志改從室壁以
涉春秋時衛地營室東壁衛之分野前明郡志主

此不敢異也考古分星皆自始封時言之衛始
在殷墟涉別自爲國其分星未必卽同室壁晉天
文志昴畢趙之分野屬冀州涉雖至戰國入趙冀
冀域大概言當屬昴畢明清類天文分野書彰衛
懷三郡皆室壁分而獨彰屬之磁州別爲昴畢分
涉固磁舊轄分星當同之

春秋時涉屬衛此相沿舊說非實據也衛在今衛輝
淇縣相距四百里未必廣地至此杜預春秋土地
名無沙侯國見於漢志亦不言其如封唐十道志

云漢沙漠尋沙漠之稱以春秋地勢考之蓋狄地耳詩旄邱傳黎侯爲狄所滅地卽今黎城與涉連壤狄則在潞安府左傳所謂潞子是已又先公敗狄於箕其地在今遼州亦涉連境是涉之西南兩界固爲狄矣且狄旣滅黎其後并衛亦爲所滅疑太行迤東依山傍險莫非狄之所在蓋春秋時狄多與中國錯處以其僻在山林不通朝貢且種類不一好事攻伐故中國從而外之其實各自立國有君長子民也沙之爲國意亦如是其稱沙者以

地爲沙漠耳至後晉漸併諸狄則地遂爲晉有不復知爲狄而漢世猶傳有沙漠之稱唐至立漠縣踪跡殆可得而尋云

舊志人物首列狐突以縣境有其廟元人顏之啟曾記之然顏記但稱其忠節當祀未嘗以爲邑產也據檀弓申生稱突爲伯氏則晉之同族據史記突爲狐偃之父偃文公舅也文公母家在翟則突又當爲翟人豈涉產再獻公時晉地不能至涉史傳可考存其廟可突列入人物徒足爲笑耳

相傳縣東韓王山爲韓信駐節處舊志以信從夏陽
渡軍襲安邑虜魏豹及由井陘間道舉趙皆去縣
絕遠不宜來萬山中駐兵考淮陰侯傳信擒夏說
關與正義云關與聚城在潞州銅鞮縣此則潞州
境距此甚邇或當時兵從縣過未可知又今安陽
東北有韓陵相傳亦韓信屯兵處信旣於鄴過邯
則間道走涉出山西取途固甚便也史言大概焉
得以其不載盡疑後人之附會耶

岳貞父子尙書在梁武帝時攷梁武時北土盡屬元

魏又爲東魏高歡分據正與梁爲敵國何緣貞兩世仕梁爲尙書豈貞北人寄籍江南抑本南人仕尙書而入北如周庾信耶今邑有其故里并父子墓俱疑案也

今士大夫往來書札並稱涉爲刈陵考刈陵本漢潞城縣後魏始改刈陵隸襄垣郡黎城固其縣地得稱刈陵無緣涉亦稱之雖涉嘗爲潞屬毗連黎境古今沿革不同無事捨古沙舊名而與黎人爭刈陵也

縣西唐王山崖壁勒釋典後有唐文宗太和六年丙寅字跡世傳唐文宗駐蹕此山下考唐自肅宗後河北悉爲藩鎮割據涉屬潞州隸昭義軍其爲劉從諫父子所據已數世矣文宗安得來此且文宗元年丁未六年乃壬子並無丙寅殆後來作僞者所爲考史惟唐莊宗伐梁曾過此其山上經像則北齊文宣帝高洋刻金胡礪武安長樂寺碑及國朝武安令陳灝志辨可互証也

舊志載陳咸紹興中進士據此則距開禧時吳曦之

反幾八十年時事殊不符又咸並未爲利州路轉
運判官其進秩係司農少卿非寶謨閣待制志傳
潦草失實據史傳正之

補遺

紀事本末崇正六年正月丁未左良玉敗賊於涿縣
西斬其渠賊望見旗幟皆靡謀渡河南犯五月庚
申曹文詔夜襲賊於偏店賊亡走陞山谷者亡筭
諸將會兵逐之沙河旣而河北賊陷涉縣六月乙
丑川兵潰於林縣丙寅河北賊圍林涉諸邑

存疑

潭泉村劉氏譜始祖成官御史中丞階光祿大夫勳
上柱國生四子長進次德次偏次某某與德後皆
別遷進有子四其長曰斌都指揮使四光先未仕
偏之子曰仲先仕至尙書二子後遷海島自斌以
下曰榮曰智曰義曰春曰尙忠曰鑑襲指揮光先
子承官尙書省承子安千戶自安以下曰剛曰相
曰紳亦襲指揮共襲職九代安弟紀別任同知歷
世仕宦惟紳見西明寺碑正德時人餘無考然村

西至今傳有尙書墳譜或非妄以時代核之臆指
揮仲先尙書皆宜在明初共祖父則金元間人文
獻無徵姑志以備考